

JAVA VI - E PREMTE

I

Leximi i parë (Zan 11, 1-9)

Ejani, të zbresim e t'ua pështjellojmë këtu gjuhën e tyre.

Lexim prej Librit të Zanafillës

¹ Mbarë toka kishte vetëm një gjuhë dhe fjalët e njëjta. ² Kur u çuan prej lindjes, gjetën një fushë në dheun e Senaarit dhe aty ngulën banimin.

³ I thanë njëri-tjetrit: "Ejani të presim tulla dhe t'i pjekim në zjarr." Tullat i përdorën në vend të gurëve e bitumin në vend të llaçit. ⁴ Dhe thanë: "Ejani ta ngrehim për vete një qytet dhe pìrg, maja e të cilit do të prekë qiellin. T'ia rrisim vetes namin që të mos shpërndahemi faqes së dheut".

⁵ Zoti zbriti përmbi tokë për të parë qytetin dhe pìrgun që e ndërtuan njerëzit. ⁶ Zoti tha: "Njëmend qenkan një popull dhe paskan vetëm një gjuhë! Ky është fillimi i veprimtarisë së tyre dhe tash e tutje nuk do të kenë vështirë të kryejnë gjithçka të synojnë. ⁷ Ejani, pra, të zbresim e t'ua pështjellojmë këtu gjuhën e tyre, që të mos mund të merren vesh njëri me tjetrin." ⁸ Prej andej Zoti i shpërndau nga ai vend mbi sipërfaqen e mbarë tokës dhe ata pushuan së ndërtuari qytetin.

⁹ Prandaj edhe quhet Babel, sepse aty u pështjellua gjuha e mbarë tokës dhe prej andej Zoti i shpërndau mi faqen e dheut.

Fjala e Zotit

Psalmi 33 (32)

Ref. ZOTI MBRETËRON MBI TË GJITHË POPUJT

¹⁰ Zoti i shpartallon synimet e popujve,
i pështjellon qëllimet e kombeve.

¹¹ Synimi i Zotit qëndron për amshim,
mendimet e zemrës së tij prej breznie në brezni.

¹² Lum ai komb që për Hyj e ka Zotin,
populli që Zoti e zgjodhi për pronë.

¹³ Zoti shikon nga qielli
e i sheh të gjithë bijtë e njerëzve.

¹⁴ Prej vendit të vet të shenjtë
i shqyrton të gjithë banorët e tokës,
¹⁵ ai që të gjithëve ua ka krijuar zemrat
e i kupton të gjitha veprat e tyre.

II

Leximi i parë (Jak 2, 14-24.26)

Sikurse trupi pa shpirt është i vdekur, kështu edhe feja pa vepra është e vdekur.

Lexim prej Letrës së Shën Jakobit apostull

¹⁴ Ç'dobi, o vëllezërit e mi, nëse ndokush thotë se ka fe, në qoftë se nuk i ka veprat? A tua mund ta shpëtojë vetëm feja? ¹⁵ Në qoftë se ndonjë vëlla ose ndonjë motër janë të zhveshur ose pa ushqimin e përditshëm, ¹⁶ dhe ndokush prej jush u thotë: "Shkoni në paqe! Nxehuni dhe ngijuni!", por nuk u jepni çka u nevojitet për trup, ç'dobi?! ¹⁷ Kështu edhe feja: në qoftë se nuk i ka veprat, është e vdekur në vetvete.

¹⁸ Por ndokush mund të thotë: "Ti ke fenë, kurse unë kam veprat. Ma trego ti fenë tënde pa vepra, kurse unë do ta tregoj prej veprave të mia fenë." ¹⁹ Ti beson se është një Hyj i vetëm? Bën mirë. Por besojnë edhe djajtë dhe dridhen! ²⁰ A dëshiron ta kuptosh, more qyqar, se feja pa vepra është e pafrytshme?

²¹ Abrahami, ati ynë, a nuk qe shfajësuar në saje të veprave, kur e kushtoi mbi altar Izakun, djalin e vet? ²² A po sheh se feja ka bashkëpunuar me veprat e tija dhe feja me vepra u përsos, ²³ dhe shkoi në vend fjala e Shkrimit shenjt që thotë: "I besoi Abrahami Hyjit dhe iu numërua për drejtësi," dhe u bë miku i Hyjit.

²⁴ A po shihni se njeriu shfajësohet me vepra e jo vetëm me fe. ²⁶ Sepse, sikurse trupi pa shpirt është i vdekur, kështu edhe feja pa vepra është e vdekur.

Fjala e Zotit

Psalmi 112 (111)

Ref. LIGJI YT, O ZOT, ËSHTË BURIM GËZIMI

¹ Lum ai njeri që e druan Zotin,
që kënaqet në urdhërimet e tij.

² Fara e tij do të jetë e fortë mbi tokë,
do të bekohet breznia e të drejtëve.

³ Pasuri e mirëqenie në shtëpinë e tij,
drejtësia e tij qëndron në shekuj të shekujve.

⁴ Ka lindur për të drejtët një dritë në errësirë:
i butë e i mëshirshëm është njeriu i drejtë.

⁵ I ëmbël është njeriu që përdëllen e huajon,
punët e veta i kryen me ndërgjegje,

⁶ ai askurrë nuk do të bjerë poshtë.

Në kujtim të përhershëm mbetet i drejti.

Aleluja!

Kushdo, pra, pranon para njerëzve se është imi, edhe unë do ta pranoj para Atit tim që është në qiell. (Mt 10, 32)

Aleluja!

Ungjilli (Mk 8, 34 - 9,1)

Ai që do ta bjerrë jetën e vet për mua e për Ungjill, do ta shpëtojë.

Leximi i Ungjillit të shenjtë sipas Markut

Në atë kohë, ³⁴ Jezusi e grishi popullin bashkë me nxënësit e vet dhe u tha: »Nëse ndokush do të vijë pas meje, le t'i bjerë mohit vetvetes, ta marrë kryqin e vet e të më ndjekë. ³⁵ Sepse, ai që do ta shpëtojë jetën e vet, do ta bjerrë, përkundrazi, ai që do ta bjerrë jetën e vet për mua e për Ungjill, do ta shpëtojë. ³⁶ E njëmend, çka i vlen njeriut të fitojë mbarë botën, nëse e humb jetën e vet. ³⁷ Çka mund të japë njeriu si këmbim për jetën e vet?

³⁸ Për të vërtetë, kujtdo t'i vijë turp për mua e për fjalët e mira para kësaj breznie të patenzonë e mëkatare, për atë do t'i vijë turp edhe Birit të njeriut kur të arrijë në lavdi të Artit të vet me engjëjt e shenjtë.«

^{9,1} Dhe u thoshte: »Për të vërtetë po ju them: ka këtu ndër ju asish që nuk do të vdesin para se të shohin se arriti me fuqi Mbretëria e Hyjit.«

Fjala e Zotit